

ՀՆԴԵՎՐՈՊԱԿԱՆ ՊԱՏԱՆԵԿԱՆ «ՍԵՎ»
ԵԴՐԱՅՐՈՒԹՅՈՒՆՆԵՐԸ, ԱՌԱՍՊԵԼԱԿԱՆ ԵՐԿՎՈՐՅԱԿՆԵՐԸ
ԵՎ ՔԱՂԱՔՆԵՐԻ ՀԻՄՆՈՒՄԸ*

ԱՐՄԵՆ ՊԵՏՐՈՍՅԱՆ

Բանալի բառեր՝ Հնդեվրոպական պատանեկան եղբայրություններ, Հնդեվրոպական առասպելաբանություն, Հնդեվրոպական անվանաբանություն, Հայ վիպական բանահյուսություն, Արմավիր, Ռոմովե, Հռոմ:

Ամփոփում

Հնդեվրոպաբանության մեջ վերականգնվում է պատանի ռազմիկների եղբայրությունների ինստիտուտը: Նրանք, ավագ առաջնորդների ղեկավարությամբ, որսորդությամբ և ավազակությամբ մի քանի տարի ապրում էին ցեղի տարածքի ծայրամասերում: Միայն դրանից հետո, նվիրագործության ծեսն անցնելով, պատանիները կարող էին դառնալ ցեղի լիիրավ անդամներ, ամուսնանալ և ունենալ իրենց սեփականությունը: Այդ եղբայրությունները կարևոր դեր են կատարել նվրասիայում Հնդեվրոպացիների տարածման գործում: Նրանց ասպատակությունները և նվաճումները հանգեցրել են նոր բնակավայրերի հիմնադրմանը և այդտեղ իրենց ցեղի մարդկանց նոր խմբերի վերաբնակեցմանը: Եղբայրությունների տարբերակիչ առանձնահատկությունը նրանց կապն էր սև/մուգ գույնի հետ: Եվ որոշ ավանդույթներում իրենք՝ պատանիները և նրանց դիցաբանական անձնավորումները կարող էին կոչվել ուղղակի Հնդեվրոպական *h₂reh₂mo- «սև, մուգ գույն» արմատով: Հայտնի են երկվորյակային կերպարների կողմից նոր քաղաքների հիմնադրման Հնդեվրոպական մի շարք լեգենդներ, որտեղ նրանք հանդես են գալիս որպես այդ եղբայրությունների դիցաբանական անձնավորումներ, իսկ քաղաքները կարող են կոչվել «սև» կամ այս կամ այն կերպ կապված լինել «սևի» հետ (Արմավիր, Սասուն, Հռոմ և այլն): Այդ առասպելությունի տարածվածությունը կարող է վկայել նրա համահնդեվրոպական բնույթը (թերևս բացառությամբ անատոլիական ավանդույթի):

Նախաբան

Հնդեվրոպական համեմատական առասպելաբանությունն ուսումնասիրում է Հնդեվրոպական ժողովուրդների առասպելները՝ դրանց համեմատության և վերլուծության միջոցով պարզելով հին Հնդեվրոպացիների դիցաբանական և

* Ներկայացվել է 07. IX. 2025 թ., գրախոսվել է 31. X. 2025 թ., ընդունվել է տպագրության 17. XI. 2025 թ.:

© Հեղինակ/ներ, 2025: Հասանելի է Creative Commons Attribution 4.0 Licence-ին համապատասխան:

կրոնական պատկերացումները, աշխարհայացքը և այլն: Բայց հին առասպելներն ու լեգենդները, լեզվական փաստերի համադրությամբ, հնարավորություն են տալիս ուսումնասիրել նաև այլ երևույթներ, այդ թվում՝ դրանց ազդագրությունը՝ հասարակության կառուցվածքը, սոցիալական խմբերը և այլն: Եղած նյութը թույլ է տվել պարզել, որ մինչև հասարակության լիիրավ անդամ դառնալը պատանիները որոշակի ժամանակ պետք է լինեին որսորդ-ռազմիկների եղբայրության անդամներ և ապա նոր՝ նվիրագործության ծեսն անցնելուց հետո, դառնային ցեղի լիարժեք անդամներ: Այդ եղբայրություններն էական դեր են կատարել հնդեվրոպացիների կյանքում և իրենց հետքերը թողել տարբեր ժողովուրդների առասպելներում: Հատկապես ուշագրավ են եղբայրություններն անձնավորող երկվորյակային տիպի հերոսների կողմից նոր քաղաքների հիմնման լեգենդները, որոնց համադրությունը թույլ է տալիս հասնել համահնդեվրոպական վերակազմության: Ընդհանրապես, հնդեվրոպական առասպելաբանության ուսումնասիրություններում հայկական նյութը չափազանց քիչ է օգտագործվում: Սա բացառիկ է այն խմատով, որ լավագույն և ամենահարուստ նյութը տալիս է հայ վիպական ավանդույթը (ազգածին ավանդություն, «Վիպասանք», «Տարոնի պատերազմ», «Սասնա ծռեր»):

Հնդեվրոպական պատանեկան եղբայրությունները

Հնդեվրոպաբանության մեջ վերականգնվում է *koryos տերմինը, որով կոչվում էին միմյանց և իրենց աստծու հետ երդմամբ կապված պատանի ռազմիկների եղբայրությունները: Եղբայրության անդամները, ավագ առաջնորդ-դաստիարակների ղեկավարությամբ, որսորդությամբ ու թալանով, հաճախ գալլի վարքագիծն ընդօրինակելով, մի քանի տարի ապրում էին ցեղի տարածքի ծայրամասերում՝ հաճախ անտառներում: Դրանից հետո միայն, նվիրագործության ծեսն անցնելով, նրանք կարող էին դառնալ ցեղի լիիրավ անդամներ, ունենալ սեփականություն և ամուսնանալ: Ի տարբերություն հասուն զինվորների, նրանք կոչվում էին մերկ կամ կենդանիների մորթով ծածկված, թեթև զինված և հաճախ գիշերը: Առասպելներում նրանք բնութագրվում են մեծ ուժով, ցավի նկատմամբ անտարբերությամբ ու վախի բացակայությամբ: Մարտի մեջ նրանց պատում էր վայրի, գալլային կատաղությունը, որն իբր մեծացնում էր նրանց բնական ուժը¹:

Այդ եղբայրությունների ղեցաբանական արտացոլումներն են, օրինակ, ուղղրաները և մարուտները՝ հնդկական աստվածներ Ռուդրայի ու Ինդրայի հետևորդները, էյնհերինները՝ սկանդինավյան Օդին աստծու բանակը, Ֆիանան՝ իռլանդացի հերոս Ֆիննի որսորդ-զինվորների խումբը և այլն²: Պատանի ռազմիկների ղեցաբանական առաջնորդը ռազմի աստված էր, որը երբեմն նույնացվել է ամպրոպի աստծու հետ: Այդպիսի աստվածներ էին, օրինակ, հնդկական

¹ Այս եղբայրությունների մասին տե՛ս McCone. 1987; Sergent. 2003, 16–19; Lincoln. 1991, 131; Mallory, Adams. 1997, 6–7, 531, 632–633; Kershaw. 2000; Mallory. 2007. Տե՛ս նաև Kórios հոդվածն անգլերեն Վիքի-պեդիայում: Սկանդինավյան բերսերկների և նմանատիպ հնդեվրոպական «խենթ/կատաղի» ռազմիկների վերաբերյալ տե՛ս Speidel. 2002.

² Տե՛ս Puhvel. 1987, 242.

Ինդերան և Ռուդերան, իրանական Միթրան, հունական Ապոլոնը, լատինական Մարսը, արևմտասլավոնական Սվանտովիտը, գերմանասկանդինավյան Վոդան/Օդինը³: Եղբայրություններին կարևոր դեր է հատկացվում Եվրասիայով մեկ հնդեվրոպացիների տարածման գործում: Նրանց ասպատակություններն ու նվաճումները հանգեցրել են նոր բնակավայրերի հիմնման, ապա ցեղերի ավելի մեծ խմբերի, այդ թվում՝ մեծահասակների, կանանց և երեխաների վերաբնակեցման⁴:

Եղբայրություններին բնորոշ էր կապը սև/մուգ գույնի հետ և որսորդությունն ու ռազմական գործողությունները գիշերային խավարում⁵: Այսպես՝ ավենական էֆեբոսները (պատանիները) սև թիկնոց էին կրում և նրանց, ի տարբերություն չափահաս ռազմիկների, հատուկ էին գիշերային որսորդությունն ու ռազմական գործողությունները⁶: Հին հնդկական Ինդրան և Ռուդրան՝ եղբայրությունների հովանավոր աստվածները, կրում էին սև հագուստներ⁷: Տակրիտսի հիշատակած գերմանական հարիները (Harii), որոնք մարտի էին գնում գիշերը՝ ներկված մարմիններով ու սև վահաններով, հավանաբար, եղել են լուգի ցեղի պատանի ռազմիկները⁸: Կորյոսի և սևի/մթության այս կապը հանդես է գալիս հին Իրանում, Հայաստանում, Սկյութիայում, Թրակիայում, Գերմանիայում, Իռլանդիայում, Բրետանում: Եղբայրության դիցաբանական առաջնորդը, ինչպես նաև զինվորները, կարող էին պարզապես կոչվել «սև»։ օրինակ, կորյոսի աստվածներից հնդկական Կրիշնայի անունը նշանակում է ուղղակի «սև»⁹ (իսկ հայոց «սև» Արամի և «թուխ մանուկների» մասին տե՛ս ստորև): Հունական ավանդությունում սև ու սպիտակ հերոսների հակադրությունը և հերթազայությունը արտացոլում են պատանի և հասուն ռազմիկների հարաբերությունները¹⁰, ինչը, այսպես թե այնպես, հատուկ պիտի լիներ նաև մյուս հնդեվրոպական ցեղերին:

Պատանի ռազմիկների մյուս առանձնահատկությունը նրանց հատուկ սանրվածքն էր՝ մազափունջը կամ մազերի հյուսքերը¹¹: Այդպես էին պատկերացվում նաև նրանց դիցաբանական անձնավորումները՝ հնդկական Ինդրան, Ռուդրան և Կրիշնան, հունական էֆեբոսների առաջնորդ Թեսևսը, իրանական հերոս Կրրեսասպան, հայկական Գիսանեն և նրա հետևորդները:

Երիտասարդական եղբայրությունների արտացոլումները հայկական բանահյուսությունում մեջ

Հայոց նախաքրիստոնեական կրոնի ամպրոպի և ռազմի աստվածն էր Վահագնը: Ազգաթանգեղոսի պատմության մեջ Տրդատ թագավորի խոսքում

³ Kershaw. 2000, 182–192.

⁴ Տե՛ս Kershaw. 2000, 172–174; Sergent. 2003, 23.

⁵ Vidal-Naquet. 1986; Sergent. 2003, 17; Mallory. 2007, 94; Petrosyan. 2011.

⁶ Vidal-Naquet. 1986.

⁷ Kershaw. 2000; Petrosyan. 2011, 345.

⁸ Kershaw. 2000, 42–43.

⁹ Այս առումով տե՛ս В а с и л ь к о в. 2019, 141.

¹⁰ Vidal-Naquet. 1986, 112; Petrosyan. 2002, 43–77.

¹¹ Kershaw. 2000, 48–50.

ասվում է. «... և քաջութիւն հասցէ ձեզ ի քաջէն Վահագնէ»¹²: Այսպիսով քաջ «արի/խիզախ, քաջ մարդ» բառը Վահագնի մակդիրն էր: Բայց քաջերը միայն քաջ ռազմիկները չէին. այդպես էր կոչվում նաև դիցաբանական էակների մի ամբողջ դաս (ժամանակակից հայերեն՝ քաջք): Ամենամեծ քաջը՝ Վահագնը, որն իր հիմնում ծնվում է որպես պատանեկիկ, հենց պատանեկան եղբայրության քաջ ռազմիկների աստվածային անձնավորումն էր ու առաջնորդը, ինչպես, ասենք, Ինդրան ու Ռուդրան էին մարուտների ու ռուդրաների համար¹³:

Հայկական ավանդական պատկերացումներում գայլը ոչ միայն կենդանի է, այլև երկոտանի դև: Նրա թափերը չրջված են հետ, ինչպես քաջքերինը, նա, ինչպես քաջքերը, ծնվում է անձրևի ժամանակ՝ արևոտ եղանակին, և կայծակը, բոլոր չարքերի ու դևերի հետ, ոչնչացնում է նաև գայլերին¹⁴: Այսպիսով կարելի է ասել, որ քաջքերը, որոնք ծնվում, ապրում ու մեռնում են գայլերի պես, համընկնում են պատանի «գայլային» ռազմիկի կերպարի հետ: Իսկ որ Վահագնը նման «գայլերի» եղբայրության առաջնորդն էր, վկայում է VIII դարի հայ պատմիչ Հովհան Մամիկոնյանի «Տարոնի պատմություն» մեծ հերոս, զորավար Գայլ Վահանի կերպարը, որի անունը հենց Վահագնի ձևափոխություններից մեկն է¹⁵:

Հայ բանահյուսության մեջ Հայտնի է թուխ մանուկի կերպարը: Այդ անունով են կոչվել բազմաթիվ քրիստոնեական ուխտավայրեր՝ մատուռներ կամ գերեզմաններ հիշեցնող կառույցներ¹⁶, սակայն թուխ մանուկները, ինչպես քաջքերը, ժողովրդական բանահյուսության մեջ երբեմն հանդես են գալիս որպես ոգիներ, ինչը ցույց է տալիս, որ նրանք ծագում են հեթանոսական ժամանակներից¹⁷: Հայերենում թուխ նշանակում է «սև, մուգ գույն», իսկ մանուկ՝ «տղա, պատանի, ռազմիկ»: Այսպիսով միայն անունով իսկ նրանք արդեն համեմատելի են պատանեկան եղբայրությունների անդամների հետ: Եվ այս կերպարի առաջին հետազոտողը՝ Ա. Մնացականյանը, դրանք արդեն համարել է պատանեկան այդ եղբայրությունների հիշողություն, որի արձագանքները Հայաստանում պահպանվել էին մինչև միջնադար¹⁸: Ի դեպ, օտերենում էլ կա այդ անվան համարժեքը՝ sau læppu «սև տղա/պատանի», որոնց կերպարը համեմատվում է ռուսական բանահյուսության добрый молодец «բարի պատանի/երիտասարդ, կտրիճի» հետ¹⁹: Կարևոր է նշել, որ բանահյուսության մեջ թուխ մանուկները հաճախ հանդես են գալիս որպես երկվորյակներ²⁰: Ակնհայտ է, որ պատանեկան եղբայրությունը հեշտությամբ կարող է անձնավորվել երկվորյակների կերպարներով:

¹² Ա գ ա թ ա ն գ ե ղ ո ս . 1983, 8:

¹³ Քաջքերի և Վահագնի՝ որպես նրանց առաջնորդի մասին տե՛ս Petrosyan. 2018.

¹⁴ Ա բ ե ղ յ ա ն . 1975, 87, 89, 92:

¹⁵ Ա ճ ա ո յ ա ն 1962, 9, Schmitt. 1984, 322–323.

¹⁶ Մ ն ա ց ա կ ա ն յ ա ն . 1976:

¹⁷ Ա լ ի շ ա ն . 1895, 217, Մ ն ա ց ա կ ա ն յ ա ն . 1976, 191.

¹⁸ Մ ն ա ց ա կ ա ն յ ա ն . 1976, 193–195:

¹⁹ Абаев. 1979, 42–43, 96–47.

²⁰ Հ ա ռ ո լ թ յ ու ն յ ա ն . 2000, 353–355:

Հայ վիպական հերոսները պատանեկան եղբայրության անդամներ

«Ազգածին ավանդություն»։ Արամ նահապետը, իր հիսուն հազարանոց նորատի (դեռատի, նորահասակ, ջահել) ռազմիկներով, բոլոր կողմերից ընդլայնում է Հայաստանի սահմանները²¹։ Հիշատակվում են նրա հաղթանակները Մարաստանում, Ասորեստանում և Կապադովկիայում։ Ազգածին ավանդությունը, լինելով հնդեվրոպական առասպելաբանության մի վառ դրսևորում, եզակի է այն բանով, որ նրանում, ի տարբերություն հնդեվրոպական այլ առասպելների ու էպոսների, հակառակորդ առաջնորդները գործառութային առումով²² համապատասխանում են իրար (այսպես՝ Հայկը և Բելը, որոնք իշխում են և ոչ ոքի չեն ենթարկվում, տիրակալության գործառութի կրողներ են, Արամը և Բարչամը՝ ռազմական, իսկ Արա Գեղեցիկն ու Շամիրամը՝ սիրո և պտղաբերության կերպարներ են)²³։ Ընդ որում՝ Արամի առաջին հակառակորդ մեղացիների առաջնորդը, ինչպես և երկրորդը՝ Բարչամը, նույնպես ռազմիկ էր ու հիշվում է որպես «պատերազմասեր», նրա բանակը, ինչպես և Արամին, կազմված էր երիտասարդ ռազմիկներից, և Արամը հաղթում է նրանց արևածագից առաջ, այսինքն՝ գիշերվա խավարում²⁴։ Այսպիսով բախումը ներկայանում է որպես մի գիշերային մարտ պատանի ռազմիկների երկու թշնամական եղբայրությունների միջև։ Անանիա Շիրակացու (VII դար) փոխանցած ավանդության համաձայն՝ հայերի նախնի Վահագնը մի անգամ դաժան ձմռանը ծղոտ է գողանում ասորիների նախնուց՝ Բարչամից, ինչի արդյունքում առաջանում է Ծիր Կաթինը կամ հայերեն՝ «Հարդագողի ճանապարհը»²⁵։ Վահագնը հեթանոս աստված է, ոչ թե հայերի նախնին, իսկ Բարչամն ազգածին առասպելում հանդես է գալիս որպես ասորիների առաջնորդ, որը սպանվում է Արամի հետ կռվում և ասորիների կողմից աստվածացվում իր քաջագործությունների համար (Բարչամ ձևը աղավաղումն է արևմտասեմական Բաալչամին՝ «երկնքի տիրակալ» դիցանվան, որով սկզբնապես կոչել են ամպրոպի աստված Հադադին)²⁶։ Ակնհայտ է, որ լեգենդում Վահագնը փոխարինել է Արամ նահապետին, ինչը կրկին

²¹ Խ ո Ր Ե Ն Ա Գ Ի. 1991, 42–44։

²² Ըստ նոր համեմատական առասպելաբանության հիմնադիր Ժ. Դյումեզիլի՝ հնդեվրոպական առասպելաբանությունը ձևավորված է երեք հիմնական տիրակալության, ռազմական և պտղաբերության գործառությունների շուրջ։ Այս «եռամաս գաղափարախոսությունը», անվերջանալիորեն կրկնվելով, ի հայտ է գալիս աստվածների և հերոսների համակարգերում, կերպարներում, նրանց հերթագայության մեջ, առասպելներում, էպոսներում, գոհաբերություններում, օրհնանքներում, անեծքներում, երկնային ու երկրային գոտիների, հասարակության դասակարգումներում և այլուր։ Դա, ըստ հեղինակի, հնդեվրոպական մշակութային բնորոշ, առանձնահատուկ հատկանիշն է՝ կապված հասարակության եռամաս դասային կառուցվածքի հետ (տե՛ս, օրինակ, Dumézil. 1992, հատկապես՝ էջ 81–115)։ Մեր նպատակներից դուրս է այդ տեսության վերաբերյալ թեր և դեմ կարծիքները ներկայացնելը։ Անկախ ամեն ինչից, Դյումեզիլի ու նրա հետևորդների ներկայացրած հսկայական նյութը կասկածից վեր է դարձնում դրա, առնվազն որպես քննության մեթոդ, կիրառելիությունը։

²³ Ahyan. 1982.

²⁴ Խ ո Ր Ե Ն Ա Գ Ի. 1991, 42–44։

²⁵ Ղ ա ն ա լ ա ն յ ա ն. 1969, 7։

²⁶ Healey. 2001, 124.

ցույց է տալիս, որ Արամը ամպրոպի աստծու էպիկական փոխակերպումն էր, ինչպես և իր հակառակորդ Բարչամը:

«Տարոնի պատերազմը»: Պատանի ռազմիկների և նրանց ջոկատների հիշողությունն առավել ցայտուն է երևում Հովհան Մամիկոնյանի «Տարոնի պատմության» մեջ²⁷: Ըստ ավանդության՝ հայոց թագավորը Տարոն գավառի իշխանությունը տալիս է Հնդկաստանից եկած Գիսանե և Դեմետր եղբայրներին: Գիսանե անունը բացատրվում է որպես «գէս» (երկար մազեր, մազափունջ, մազերի հյուսք) ունեցող», իսկ եղբայրների ու նրանց հետևորդների մասին ասվում է որ նրանք «սեւք էին եւ գիսաւորք եւ զազրատեսիլք, զի ցեղով ի Հնդկաց էին»²⁸: Նրանց սերունդների շրջանում ընդունված էր տղաների գլխին թողնել միայն ճակատի խոպուպը կամ հյուսքը, որը, ինչպես ասվեց, հնդեվրոպական պատանի ռազմիկների բնորոշ հատկանիշն էր: Ընդ որում՝ այդ գեսը, ըստ սովորության, կրել են բոլոր հայ պատանիները²⁹: Եվ որքան էլ շեշտվի, որ Գիսանեն, Դեմետրը և նրանց ուղեկիցները հնդիկներ էին, իրականում սա հնազույն՝ մոռացված հնդեվրոպական իրողությունների մի հիշողություն է: Իսկ Սուրբ Կարապետը (այսինքն՝ Հովհաննես Մկրտիչը) այս երկում հայոց բանակի երկնային առաջնորդն է, ամպրոպային Վահագնի քրիստոնեական ժառանգը, և ներկայացվում է որպես «այդ մի գիսաւոր ընդ ամպս որոտացեալ»³⁰ (ինչից հետևում է, որ Վահագնը ինքն էլ գիսավոր է պատկերացվել):

«Ասանա ծուեր»: Կարելի է ասել, որ այս էպոսի մեծ հերոսները պատանի ռազմիկների եղբայրության անդամների վիպական ժառանգներ են³¹: Այսպես՝ իրենց գրեթե բոլոր սխրանքները նրանք կատարում են մանկության կամ պատանեկության շրջանում: Հերոսների կենսագրությունը, փաստորեն, հանգեցվում է այդ տարիներին և ավարտվում ամուսնությունով ու որդու ծննդով, որից հետո հերոսին մնում է մեռնել կամ զոհվել իր վերջին մարտում (այսինքն՝ երբ հերոսն անցնում է հաջորդ սոցիալական դաս, էպոսը, փաստորեն, կորցնում է հետաքրքրությունը նրա նկատմամբ): Հերոսի գինակիցները, եթե այդպիսիք առկա են, չհասունացած պատանիներ են: Հերոսը (Դավիթը կամ Փոքր Մհերը) զվարճանում ու նույն գինի է խմում 40 չամուսնացած տղաների և 40 չամուսնացած աղջիկների հետ: Գլխավոր հերոսների բոլոր սերունդների մշտական խորհրդատուն՝ քեռի Թորոսը, համեմատելի է *koryos-ի դաստիարակի կերպարի հետ: Հերոսների ծուռ «խենթ, կտրիճ» մակդիրը կարող է բնորոշել նրանց խենթ մոլեգնության հասնելու ունակությունը, որը վանում է մահվան վախը և հաղթանակ ապահովում մարտում³²:

Ար(ա)մ- տարրը ազգածին ավանդության մեջ

Ազգածին ավանդությունը պատմություն է հայոց առասպելական նախնի Հայկի և նրա ժառանգների յոթ սերունդների մասին, որոնք, ըստ առասպելի

²⁷ Հ ա Ր Ո Ւ Թ Յ Ո Ւ Ն Յ ա ն. 2000, 121–131:

²⁸ Զ ո Վ Հ ա ն Մ ա մ ի կ ո ն ե ա ն. 1941, 107:

²⁹ Փ ա վ ս տ ո ս Բ ու զ ա ն դ. Ե, խգ, տե՛ս Հ ա Ր Ո Ւ Թ Յ Ո Ւ Ն Յ ա ն. 2000, 125:

³⁰ Հ ա Ր Ո Ւ Թ Յ Ո Ւ Ն Յ ա ն. 2000, 121–123, 141–144:

³¹ Васильков. 2019, 141–144.

³² Васильков. 2019, 143–144.

տերմինաբանություն, կոչվում են «արք ազգածինք»։ Հայերի հայ ինքնանվանումը համարվում է ծագած Հայկի անունից։ Ըստ պատմահայր Խորենացու³³ արմեն և նման ցեղանունները, որով մյուս ժողովուրդները կոչում են հայերին, ծագում է Հայկից հետո յոթերորդ նահապետի՝ Արամի անունից (որը, ինչպես վայել է *koryos-ի իսկական առաջնորդին, բոլոր կողմերից ընդարձակում է Հայաստանի սահմանները և այդպիսով ստեղծում մի նոր Հայաստան), իսկ ըստ հայոց «նախնական պատմության»՝ հայտնի Սեբեոսի գրքից, Հայկի որդի Արամանյակի անունից³⁴։ Ինչևէ, չորս նահապետների՝ Արամանեակի, Արամայի (այս անունները հաղորդվում են նաև Արմանեակ/Արմէնակ ու Արմայիս ձևերով), Հարմայի և Արամի անունները պարունակում են ար(ա)մ- տարրը։ Կարելի է ենթադրել, որ այդ տարրով սկզբնապես կոչվել է հնագույն հայերի մի ենթաէթնիկ խումբ, որը նշանակալի դեր է խաղացել հայ ժողովրդի ձևավորման մեջ։

Ազգածին առասպելի գլխավոր հերոսները՝ Հայկը, Արամը և Արա Գեղեցիկը, ծագում են հայոց հնագույն աստվածների կերպարներից³⁵։ Հայկը վիպական փոխակերպումն է դիցարանի գլխավոր աստծու՝ աստվածների ընտանիքի նահապետի, Արամը՝ ավանդության միակ ռազմատենչ կերպարը՝ ռազմի, իսկ նրա որդի Արա Գեղեցիկը՝ մեռնող և հառնող աստծու։ Հաշվի առնելով Արամի՝ նորատի ռազմիկների առաջնորդի կերպարը՝ պետք է կարծել, որ նա, ինչպես հնդեվրոպական որոշ նման կերպարներ, համատեղում էր ամպրոպի աստծու և պատանի ռազմիկների եղբայրության առաջնորդի գործառույթները։ Հնդեվրոպական համատեքստում Արամի անվան լավագույն համապատասխանությունները Ռամա անունով հնդկական հերոսներն են և հատկապես նրանցից առաջինը՝ Պարաշուրաման՝ «Կացնով Ռաման»³⁶։ Ռամա (Rāma) անունը ստուգաբանվում է հնդեվրոպական *h₂reh₁mo- «սև, թուխ» արմատով³⁷։ Այդ ստուգաբանությունը հաստատվում է այդ Ռամայի Արջունա անունով հերոսի նկատմամբ տարած հաղթանակի առասպելով (Arjuna, հնդեվրոպական *h₂erg'- «սպիտակ, փայլուն» արմատից)³⁸։ *H₂reh₁mo- և *h₂erg'- արմատներով կազմված այս առասպելությունը աշխարհի ժողովուրդների առասպելներում և էպոսներում լայնորեն տարածված «սևի ու սպիտակի» թեմայի դրսևորումներից մեկն է³⁹։ Կա նաև կարևոր նմանություն մեկ այլ Ռամայի՝ «Ռամայանա» էպոսի հերոսի ու Արամի միջև։ Այս Ռաման, ինչպես Արամը, ամպրոպի աստծու էպիկական փոխակերպումն է⁴⁰։ Նրա վտարումը իր երկրից ու երկվորյակ եղբոր և կապիկների ու արջերի անհամար բանակի հետ Լանկան նվաճելու նրա հեռավոր արշավանքը հիշեցնում են պատանեկան եղբայրությունների ռազմական արկածները (որի անդամները երբեմն կրում էին գազանների, այդ թվում՝ արջի մորթի,

³³ Խորենացի. 1991, 42։

³⁴ Մանրամասն տե՛ս Սարգսյան. 1998, 123։

³⁵ Պետրոսյան. 2020, 38–42։

³⁶ Petrosyan. 2002, 44–45.

³⁷ Mayrhofer. 1996, 449.

³⁸ Puhvel. 1987, 90.

³⁹ Petrosyan. 2002, 43–77, 107–115.

⁴⁰ Puhvel. 1987, 92–93.

Համտ. սկանդինավյան բերսերկների անվան «արջի մորթի հագած» մեկնաբանությունը) և կարող են ակնարկել նրա առասպելում համապատասխան ենթաշերտի գոյությունը: Յ. Վասիլկովի հաղորդման համաձայն՝ այդ մասին կարող է վկայել նաև Շրի Լանկայի նվաճման զուգահեռ պատմությունը, որի հերոսը Վիջայան է՝ իր պատանեկան ջոկատով⁴¹:

«Սև ու սպիտակի» թեման Արամի պատմության մեջ: Արամի երրորդ և վերջին՝ դիցաբանորեն ամենանշանակալի հաղթանակը տեղայնացվում է Կապադոկիայում՝ Արգեոս լեռան շրջանում (հունարեն՝ Argaios/Argeos, ներկայիս թուրք. Erciyes), որտեղ Արամի տոհմակից Մշակը կառուցում է Մաժաք քաղաքը (հետագայում՝ Կեսարիա)⁴²: Այն Փոքր Ասիայի ամենաբարձր և ամենապաշտելի լեռն էր, առասպելների ու լեգենդների հզոր կենտրոն, որը դեռևս խեթական ժամանակներում կապված էր ամպրոպի աստծու հետ և հայտնի էր որպես Harga (հնդեվրոպական *h₂erg՝ - «սպիտակ» արմատից)⁴³: «Սևի ու սպիտակի» առասպելի համատեքստում այդպես կարող էր կոչվել ամպրոպի աստծու հակառակորդը: Լեռն իր տեղում զոհված դիցաբանական կերպարի անունով կոչելու համար Համտ., օրինակ, նեմրոթ (= նեբրոթ) և Արա լեռնանունները կոչված իբր այդ վայրերում սպանված կերպարների անուններով⁴⁴: Արամի այս հաղթանակի առասպելը Յ. Մարկվարտը համեմատում է Ջևհի և Տիփոնի մենամարտի հետ, որը տեղի է ունեցել «Արիմբում» (Իլիականում՝ ein Arimois «Արիմներում»)⁴⁵: Հաշվի առնելով, որ Արգեոսը համարվել է այդ մենամարտի հնարավոր տեղայնացումներից մեկը, նա Արամին համադրել է ամպրոպային Ջևհի, իսկ արիմներին՝ նույնացրել վաղնջահայերի հետ⁴⁶: Արիմքը համարվել է այրված, հրաբխային մի վայր, որտեղ շանթարձակ Ջևհը կայծակնահարել է Տիփոնին և նրա շուրջը գտնվող երկիրը: Այն տեղայնացվել է բազմաթիվ վայրերում, այդ թվում՝ Փոքր Ասիայի մի սև, այրված երկրամասում, որտեղ մի ժամանակ իբր իշխել է լեգենդար Արիմուս արքան⁴⁷:

«Սևի ու սպիտակի առասպելի» մեկ այլ դրսևորում է խուռիական ամպրոպի աստված Թեշուբի և Արծաթ աստվածությունների մենամարտի առասպելը⁴⁸, ընդ որում՝ այս աստծու անունը ծագում է *h₂erg՝ - արմատից⁴⁹: Եվ քանի որ Արգեոս լեռը վաղնջական ժամանակներից կապված է եղել ամպրոպի աստծու հետ, հնարավոր է, որ հենց այնտեղ է եղել նրա և Արծաթի կռվի տեղայնացումներից մեկը:

Այս առասպելի անունները հետքեր են թողել նաև Ուրարտուի վաղ շրջանի անվանաբանության վրա: Այսպես՝ ուրարտական առաջին արքայի Արամու

⁴¹ Vassilkov. 2015, 242–243.

⁴² Markwart. 1928, 216–217; Petrosyan. 2002, 43–44.

⁴³ Laroche. 1985, 88–89.

⁴⁴ Ղ ա ն ա լ ա ն յ ա ն. 1969, 166–167:

⁴⁵ Հ ո մ եր ո ս. 1955, 73:

⁴⁶ Markwart. 1928, 215–217.

⁴⁷ Страбон. 1964, 588–589. Արիմների տեղայնացումների վերաբերյալ տե՛ս Vian. 1960, 19–24.

⁴⁸ Petrosyan. 2002, 46–50.

⁴⁹ Hoffner. 1988, 163; Puhvel. 1991, 242; Համտ. նույնարմատ հայ. արծաթ, լատ. argentum բառերը:

անունը համեմատելի է Արամ նահապետի անվան հետ (հնագույն հայ. *Արամո, սեպագրում նշաններ չկան օ-ի համար և այն հաղորդվում է որպես ու), ընդ որում՝ և՛ առասպելական Արամը, և՛ պատմական Արամուն ժամանակագրվում են որպես Ասորեստանի Շամիրամ թագուհու (իշխել է մ. թ. ա. IX դ. վերջին տասնամյակում) ավագ ժամանակակիցներ: Ակնհայտ է, որ առասպելական Արամի կերպարը յուրացրել է պատմական Արամու արքայի հատկանիշները, որն ինքը, հավանաբար, կոչվել է հնագույն հայոց ամպրոպի աստծու՝ *koryos-ի առաջնորդի «սև» մակդիրով: Արամուի արքայական քաղաքը Aršašku(n)-ն էր, հավանաբար, հետագա հայ. Արճեշը (< *h₂erg'-)՝ Վանա լճի հյուսիսում, այն շրջանում, որտեղից, ըստ առասպելի, Հայկի որդի Ար(ա)մանեակը և նրա տոհմը տեղափոխվել են Արարատյան դաշտ⁵⁰: Պատմական և դիցաբանական անունների միջև այս կապը պետք է բացատրվի մարդկանց և աշխարհագրական օբյեկտները առասպելաբանական անուններով կոչելու սովորությունը (հմմտ. Հոռմի հիմնադրման առասպելում հայկականի հետ նույնարմատ հնդեվրոպական անվանումների գոյությունը՝ երկվորյակները լքում են իրենց հայրենի «սպիտակ» քաղաքը և նոր վայրում կառուցում իրենց «սև» քաղաքը):

Հնդեվրոպական *h₂reh₁mo-ի կանոնավոր արտացոլումը հայերենում կլինի արիմ-, իսկ դրա *h₂roh₁mo- և *h₂rh₁mo ձայնդարձային տարբերակները՝ համապատասխանաբար՝ արում- և արամ-, որոնք ածանցյալ ձևերով կվերածվեն արմ-ի: Առաջին հայկազունների՝ Հայկի որդու և թոռան Արամանեակի ու Արամայիսի անունները կարելի է կլինել համարել Արամ անվան ածանցյալներ, սակայն իբր Արամայիսի անունով կոչված Արմավիրի անվան մեջ ունենք արմ-, այլ ոչ թե արամ-, բացի այդ, առասպելում Արամը Հայկի յոթերորդ սերունդն է, և անտրամաբանական է, թե ինչու պետք է նրա հեռավոր նախնիները տոհմի երկրորդ ու երրորդ ներկայացուցիչները, կոչվեին նրա անունով: Հետևաբար ամենահավանական մեկնաբանությունը հետևյալն է. իսկական ձևերը Արմանեակ-ն ու Արմայիս-ն են, որոնք ծագում են արիմ- (գուցե և արում-) արմատից, իսկ երկրորդ վանկում -ա- ունեցող ձևերը երկրորդական են՝ ձևափոխված Արամի՝ տոհմի ամենաականառու ներկայացուցչի անվան ազդեցությամբ: Դա կարող է վկայել նաև ասորեստանյան և ուրարտական արձանագրություններից հայտնի Erimena անձնանունը (հավանաբար հայ. Ար(ի)մենա)⁵¹: Ըստ այդմ՝ արմեն ցեղանունը ևս, ամենայն հավանականությամբ, արիմ- արմատի ածանցյալ մի ձև է (հիշենք նաև Մարկվարտի կողմից վաղնջահայերի նույնացումը Արիմքի հետ):

Հայկական ավանդական վեպերին բնորոշ է հերոսների հետևյալ ծննդաբանական շարքը. 1. տոհմի հիմնադիր՝ աստվածային կերպար, 2. դիցաբանական երկվորյակներ, 3. գլխավոր հերոս՝ վիշապամարտիկ, 4. մեռնող և հարություն առնող հերոս⁵²: Դիցաբանական երկվորյակներին բնորոշ է նրանց անունների նույնարմատ կամ ուղղակի նման լինելը (օրինակ՝ հայկական Սանասար և Բաղդասար, Երվանդ ու Երվազ, Խուռիական Թեշուբ և Թաշմիշու, Հոռմեական

⁵⁰ «Անի ու սպիտակի» առասպելի համատեքստում այս և նման հնդեվրոպական տեղանունների մասին տե՛ս Petrosyan. 2002, Petrosyan. 2018a, 126–129.

⁵¹ Զ ա հ ու կ յ ա ն. 1987, 431–432:

⁵² Petrosyan. 2002, 115–121.

Remus ու Romulus, ուելսյան Llud և Llefelis): Երկվորյակներից մեկին հաճախ տրվում է ավելի կարևոր դեր, և հիերարխիկ տարբերությունների արդյունքում նրանք երբեմն փոխակերպվում են ավագ ու կրտսեր եղբայրների կամ հոր և որդու: Այսպես՝ «Տարոնի պատմության» մեջ Գիսանեն ու Դեմետրը հիշատակվում են մեկ որպես եղբայրներ, մեկ՝ որպես հայր ու որդի, իսկ իրանական էպոսում հայր և որդի Լուհրասպն ու Գուշտասպը ծագում են երկվորյակների կերպարներից⁵³: Ար(ա)մանեակն ու Ար(ա)մայիսը, դատելով ծննդաբանական շարքում նրանց գրաված դիրքից (տոհմի հիմնադրից անմիջապես հետո) և անունների նմանությունից, նույնպես պիտի ծագեին երկվորյակային կերպարներից⁵⁴:

Նոր քաղաքի հիմնման առասպելը

Ազգածին ավանդություն: Հայկի որդի Ար(ա)մանեակը լքում է Վանա լճի հյուսիս-արևմուտքում գտնվող հոր ուստանը և հաստատվում Արարատյան դաշտում՝ Արագած լեռան ստորոտում, որտեղ նրա որդի Ար(ա)մայիսը կառուցում է հայոց առաջին մայրաքաղաքը և իր անունով այն անվանում Արմավիր⁵⁵: Հաշվի առնելով այդ հերոսների անունների մասին ասվածը՝ քաղաքանունը կարող է մեկնաբանվել որպես Արմ-ա-ւիր, որտեղ արմ-ը ծագում է *h₂reh₁mo-/*h₂roh₁mo-ից, -ա-ն հոգակապ է, իսկ վիր-ի ամենահավանական ստուգաբանությունը հանգում է այն խեթերեն pir՝ «տուն/բնակավայր» արմատին (հմմտ. իտրենացու և Սեբեոսի վկայությունները Արամայիսի կողմից Արմավիր քաղաքի՝ որպես «տուն բնակութեան» հիմնադրման մասին), որտեղ -ւ-ն միջձայնավորային -ր-ի հայերեն կանոնավոր արտացոլումն է⁵⁶:

Ակնհայտ է հետևյալ վերակազմությունը: Երկվորյակ եղբայրները, որոնք անձնավորում են պատանի ռազմիկների եղբայրությունն ու նրանց առաջնորդներին, լքում են իրենց հոր երկիրը և ինչ-որ տեղ՝ հեռվում, կառուցում իրենց նոր բնակավայր/քաղաքը, որն անվանում են «Սև տուն/բնակավայր»՝ ըստ եղբայրությանը բնորոշ գույնի, ընդ որում՝ Ար(ա)մանեակ և Ար(ա)մայիս անունները ևս ծագում են ամպրոպի ու պատանի ռազմիկների աստծո «սև» մակդիրից, իսկ իրենք՝ հերոսներն էլ այդ աստծու վիպական փոխակերպումներն են:

«Վրպասանք»: Այսպես է կոչվում հայոց հին արքայատոհմի՝ Երվանդունիների և նրա ճյուղի՝ Արտաշիսյանների դարաշրջանի էպոսը, որից շատ հատվածներ են պահպանվել իտրենացու մոտ: Այստեղ, ինչպես ազգածին ավանդության մեջ, գլխավոր գործողությունները տեղի են ունենում Արարատյան դաշտում ու մերձակալքում: Արքայական ծագում ունեցող մի կնոջ և ցլի անբնական հարաբերությունից ծնվում են Երվանդ ու Երվազ եղբայրները, որոնցից առաջինը դառնում է արքա, իսկ երկրորդը՝ քրմապետ: Հայագիտության մեջ նրանք համարվում են երկվորյակների տիպական կերպարներ⁵⁷: Երվանդը ակնհայտորեն Երվանդունիների տոհմի գլխաբանական հիմնադիրն է, որին իտրե-

⁵³ Wikander. 1950, 317–318.

⁵⁴ Պետրոսյան. 2020, 12:

⁵⁵ Խորենացի. 1991, 39, Սեբեոս. 1939, 5:

⁵⁶ Petrosyan. 2012, 275–277.

⁵⁷ Հարությունյան. 2000, 105–111, 341–348:

նացին, փոխելով էպոսի ժամանակագրությունը, տարել է ավելի ուշ ժամանակներ⁵⁸: Ընդ որում՝ երվանդը կառուցում է երկրի նոր մայրաքաղաքը՝ Երվանդաշատը: Նրա կերպարը բնութագրվում է ամպրոպի աստծու հատկանիշներով⁵⁹, և ցույց է առնում խորհրդանշան էր հին հնդեվրոպական ու մերձարևելյան ավանդույթներում⁶⁰:

«Տարոնի պատմություն»: Եղբայրներ կամ հայր և որդի Գիսանեն ու Դեմետրը, ինչպես և իրենց հետևորդները, իշխանություն են ստանում Տարոնում և կառուցում են Վիշապ քաղաքը: Տարոնը պաշտամունքի կենտրոնն էր ամպրոպային Վահագն աստծու, որը, ինչպես իր հնդեվրոպական համապատասխանությունները, առասպելում կոչվում ու հաղթում է օձ-վիշապին: Ընդ որում՝ նրա բնորոշ մակդիրն էր վիշապաքաղ, իսկ Գիսանեն ինքը, ինչպես տեսանք, Վահագնի մի վիպական փոխակերպումն է: Վիշապ քաղաքի առթիվ նշենք, որ առասպելներում նոր կառույցները՝ բնակավայրեր, տաճարներ և այլն, հաճախ հիմնվում են աստծու հակառակորդ վիշապի կամ նման մի կերպարի սպանությունից հետո ու կոչվում նրա անունով (Համտ. և Նեմրոթ լեռան մասին ասվածը):

«Սանաա ծուր»: Երկվորյակներ Սանասարն ու Բաղդասարը լքում են իրենց երկիրը և հեռվում՝ Սև սարի վրա, կառուցում իրենց նոր քաղաք Սասունը⁶¹, որը դառնում է հերոսների հաջորդ սերունդների օրրանը: Սև սարի իրական անվանումը Սիմ է, որը ծագում է հնդեվրոպական *k'iehmo- «սև, մուգ գույն» արմատից⁶²: Սանասարը իրեն համեմատում է ամպրոպաբեր սև ամպի հետ, այսինքն՝ նա ոչ միայն ամպրոպային հերոս է, այլև, ինչպես Արամը և ուրիշները՝ «սև» հերոս և, ընդհանուր առմամբ, շատ ավելի ցայտուն ձևով, քան Արամանեակը, Արամն ու Երվանդը, ներկայացնում է ամպրոպի աստծու վիպական փոխակերպումը⁶³, ինչը ցույց է տալիս, որ նրա աստվածային նախորդը՝ հին հայոց ամպրոպի աստվածը, երկվորյակ էր, ինչպես հնդկական Ինդրան և խուեփական Թեշուբը⁶⁴:

Քաղաքի հիմնման հիշյալ չորս դեպքերում (Արմավիր, Երվանդաշատ, Վիշապ, Սասուն) նկատելի են ընդհանուր գծեր, որոնցից կարելի է նշել հետևյալները.

1. բոլոր օրինակները կապված են ամպրոպային առասպելի հետ. Ար(ա)մանեակ և Ար(ա)մայիս անունները ծագում են ամպրոպի աստծու՝ *koryos-ի առաջնորդի մականվան արմատից: Երվանդը, Սանասարը և Գիսանեն ամպրոպի աստծու վիպական փոխակերպումներ են: Վիշապ քաղաքը կոչվել է ամպրոպի աստծու հակառակորդի անունով:

2. նոր քաղաքի (մայրաքաղաքի կամ վիպական կենտրոնի) հիմնումը վերագրվում է երկվորյակներին, երկվորյակատիպ հերոսներին կամ նրանցից մեկին (Արամայիս, Երվանդ, Գիսանե և Դեմետրե, Սանասար ու Բաղդասար):

⁵⁸ Ղ. Ե. չ. յ. ա. ն. 2012, 48:

⁵⁹ Հ. ար. ու. թ. յ. ու. յ. ա. ն. 2000, 105–112:

⁶⁰ ИВАНОВ. 1980.

⁶¹ Ա. բ. Ե. ղ. յ. ա. ն. 1966, 333:

⁶² Martirosyan. 2010, 683, 812.

⁶³ Ա. բ. Ե. ղ. յ. ա. ն. 1966, 417, 1975, 72–76:

⁶⁴ Պ. Ե. տ. ր. ո. ս. յ. ա. ն. 2020, 19–21, 43, 47–51:

3. քաղաքի հիմնադիրները կապված են սև գույնի հետ (Արամանեակ և Արամայիս, Գիսանե ու Դեմետր, Սանասար):

4. քաղաքի կամ լեռան (բլրի) անունը, որի վրա կառուցվում է քաղաքը, նույնպես կարող է կապված լինել «սևի» հետ (Արմավիր, Սասուն):

Հնդեվրոպական զուգահեռներ

Հնդեվրոպական ժողովուրդների առասպելներում կան պատմական օրինակներ և առասպելներ երիտասարդական եղբայրությունների կողմից քաղաքների ու երկրամասերի հիմնադրման և դրանք իրենց անուններով կոչելու մասին: Առանձին կարելի է նշել «գալլ» նշանակող ցեղանուններն ու տեղանունները, քանի որ դրանց գոնե մի մասի ծագումը կարող է կապ ունենալ պատանի ռազմիկների այդ կենդանական սիմվոլի հետ⁶⁵: Ստորև ներկայացվում են մի քանի ակնհայտ Հնդեվրոպական օրինակներ, որոնք ցույց են տալիս պատանի ռազմիկների կողմից քաղաքի հիմնադրման առասպելի տարածվածությունը:

Հնդկաստան: «Մահաբհարատայում» որպես պատանեկան եղբայրության վիպական արտացոլում կարող են դիտվել էպոսի հինգ գլխավոր հերոսները՝ Պանդավա եղբայրները (որոնցից երկուսը երկվորյակներ են): Հոր մահից հետո նրանք մեծանում են իրենց հորեղբայր Դհրտարաշտրա արքայի արքունիքում, նրա որդիների՝ Կաուրավա եղբայրների հետ մշտական տարաձայնությունների մեջ: Հերոսների՝ պատանեկան եղբայրության անդամներ լինելը բացահայտվում է այն դրվագում, որտեղ նրանք, զրկված թագավորությունից, այլևայլ սխրանքներ գործելով թափառում են անտառներում: Կա նաև նոր քաղաքի կառուցման պատմություն. Պանդավաները լքում են իրենց երկիրը և հեռավոր մի թագավորություն հիմնում, որտեղ կառուցում են մայրաքաղաք Ինդրապրաստհան («Ինդրայի հարթավայրը»)՝ այն դարձնելով քաղաքներից լավագույնը⁶⁶:

Պրուսիա և Լիտվա: Ըստ տեղական ժամանակագիր Պիտեր Ֆոն Դուբուրգի (XIV դ.)՝ պրուսների և ողջ բալթյան աշխարհի հեթանոս կրոնական առաջնորդը, որին նա համեմատում է Հռոմի պապի հետ, ապրել է Պրուսիայի Ռոմովե կոչվող վայրում, ընդ որում՝ Ռոմովեն էլ համարում է ծագած լատիներեն Ռոմա «Հռոմ» անունից: Պրուսները բալթիական լիտվացիներին և լատվիացիներին ազգակից ցեղեր էին, որոնք ապրում էին ներկայիս Գերմանիայի, Լեհաստանի և Ռուսաստանի Կալինինգրադի մարզի տարածքներում: Իսկ պրուսական ժամանակագիր Սիմոն Գրունաուի (XVI դ.) վկայությամբ՝ Պրուսիայի առասպելական հիմնադիրները՝ Վիդեուտ և Բրուտեն եղբայրները, եկել են Կիմբրիայից (ժամանակակից Դանիայի տարածք) ու բնակություն հաստատել Պրուսիայում: Վիդեուտը հիմնադրել է պրուսների աշխարհիկ իշխանությունը և դարձել արքա, իսկ Բրուտենը հիմնել է գլխավոր պաշտամունքային կենտրոնը (այսինքն՝ Ֆոն Դուբուրգի Ռոմովեն), որն այս հեղինակը կոչում է Ռիկոյոտո, այդտեղ կառուցել բնակավայր իր աստվածների ու իր համար և դարձել գլխավոր քուրմ: Նշված վայրում մի մեծ կաղնու վրա, եղել են տեղի երեք աստվածների կուռքերը՝ ամպրոպի աստված Պերկունոյի գլխավորությամբ: Վիդուլուտի

⁶⁵ Kershaw. 2000, 133–142.

⁶⁶ Васильков. 2019.

դրոշի վրա Պերկունոն պատկերված է եղել որպես սև մորուքավոր տղամարդ, իսկ մյուս երկուսը համապատասխանաբար՝ անմորուս երիտասարդ ու մահվան պես գունատ ծերունի⁶⁷: Վ. Վ. Իվանովի և Վ. Ն. Տոպորովի կարծիքով՝ Վիդևուտը և Բրուտենը դիցաբանական երկվորյակներ են: Եղբայրների գալուստը հեռուներից, նոր բնակավայրի հիմնումը և սեփական սպիտակի հակադրությունն այստեղ ակնհայտ են: Ըստ այդմ՝ այս պատմությունը կարելի է դիտել պատանեկան եղբայրությունների արչավանքների ու քաղաքների հիմնման մասին հնդեվրոպական լեգենդների համատեքստում, և Ռոմովեն էլ՝ որպես այն տեղանուններից մեկը, որոնք ծագում են *h₂roh₁mo-ից (բալթյան լեգուններում կոկորդային h₂-ը և h₁-ը հետքեր չեն թողել):

Լիտվայի մայրաքաղաք Վիլնյուսի հիմնադրման լեգենդը պատմում է, որ գլխավոր քուրմ Կրիվե-Կրիվայտիսի որդին՝ Լիգդեյկան, մեծանալով ինքն է դառնում Կրիվե-Կրիվայտիս՝ գլխավոր քուրմ և գուշակ, Լիտվայի մեծ իշխան Գեդիմինասի՝ Վիլնյուսի հիմնման մասին երազի մեկնաբանողը: Ըստ Իվանովի և Տոպորովի՝ այս լեգենդը Ռոմովեի հիմնման պրոտոսական ավանդության մի ուշ գուգահեռն է:

Իտալիա: Այս համատեքստում հայ-իտալական կապերն անհամեմատ ավելի խորն են ու հարուստ: Հանրահայտ է երկվորյակների կողմից Հռոմի հիմնման ավանդությունը: Երկվորյակ եղբայրներ Հռեմոսն ու Հոմուլոսը (լատ. Remus և Romulus) Ալբա Լոնգա քաղաքի արքա Նումիտորի դստեր և պատերազմի գալլային աստված Մարսի որդիներն էին: Նրանց մայրը սպանվում է, Նումիտորին գահընկեց է անում իր եղբայր Ամուլիոսը, նորածին երկվորյակներին կերակրում է Մարսի ուղարկած էգ գալլը, ապա նրանց գտնում և մեծացնում է մի հովիվ: Եղբայրները մեծանալով դառնում են պատանեկան խմբերի առաջնորդներ և զբաղվում թալանով՝ անասնաբուծությամբ, այսինքն՝ *koryos-ի տիպիկ ներկայացուցիչներ են⁶⁸: Նրանք սպանում են Ամուլիոսին և իրենց պապին վերադարձնում գահին, ապա որոշում կառուցել իրենց նոր քաղաքը: Քաղաքի տեղի հարցում վիճաբանության պատճառով Հռոմուլոսը սպանում է Հռեմոսին, հիմնում քաղաքը, այն անվանում իր անունով Հռոմ (լատիներեն՝ Rōma), դառնում նրա տիրակալը և այն բնակեցնում տարբեր ծագում ունեցող մարդկանցով (լատիներ, էտրուսկներ ու սաբիններ):

Կարծիք կա, որ Ժ. Դյումեզիլի ամենակարևոր ներդրումը գիտության մեջ բացահայտումն է այն իրողության, որ Հռոմի վաղ շրջանի արքաների ողջ կամ համարյա ողջ ավանդական պատմությունը իրականում պատմականացած հնդեվրոպական առասպել է⁶⁹: Շատ հատկանշական է, որ հայկական վիպական հերոսների ծննդաբանական շարքի բնութագրերը (լատ Դյումեզիլի գործառությունների) շատ մոտ են Հռոմի առաջին թագավորների շարքին⁷⁰: Ընդ որում՝ Հռոմում կարելի է գտնել նաև հնդեվրոպական արմատներով կազմված «սեփական» առասպելի հետքեր: Այսպես՝ Հին Հռոմի կենտրոնական փողոցներից

⁶⁷ Puhvel. 1974; Иванов, Топоров. 1983. 170–175.

⁶⁸ Bremmer. 1987, 32–34.

⁶⁹ Littleton. 1982, 70.

⁷⁰ Petrosyan. 2002, 118–122.

մեկը կոչվում էր Argiletum «Արգոսի մահ»: Ապա Հռոմուլոսը Հռոմը հիմնադրում է Տիրեր գետի ափին, որի վտակներից մեկը սկիզբ է առնում Ալբա «Սպիտակ» լճից: Այդ գետը սկզբնապես կոչվել է Albula < h₂elbh- (Ալբա անվան նվազականը), իսկ Հռոմուլոս անունը կարելի է հանգեցնել հնդեվրոպական *h₂roh₁mo- «սև» արմատին՝ նույն -ul- նվազական վերջածանցով, որը վկայում է այդ անունների՝ առասպելաբանաստեղծական համատեքստում որոշակի կապի մասին: Նույն առասպելությունի մեկ այլ դրսևորում է հռոմեական երկվորյակների ծագումը Ալբա Լոնգա («Սպիտակ երկար») քաղաքից և հետագայում այս քաղաքի ու Հռոմի պատերազմը: Որոշվում է, որ պատերազմը պետք է փոխարինվի հռոմեացի և ալբացի եռվորյակ եղբայրների՝ Հորացիոսների ու իրենց զարմիկ Կուրիացիոսների միջև մարտով: Մարտի սկզբում երկու Հորացիոս եղբայրները զոհվում են, սակայն երրորդ եղբորը հաջողվում է խորամանկորեն մեկուսացնել իր հակառակորդներին և մեկ առ մեկ սպանել նրանց: Հետագայում Ալբա Լոնգան ոչնչացվում է հռոմեացիների կողմից⁷¹:

Այսպիսով կարելի է ասել, որ Հռոմի հիմնադրման լեգենդում երկվորյակ հերոսները՝ քաղաքի հիմնադիրները, պատանեկան եղբայրությունների տիպիկ ներկայացուցիչներ են, և այստեղ ևս, ինչպես հայկական էպոսներում, ի հայտ են գալիս հնդեվրոպական «սևի ու սպիտակի» առասպելի արձագանքները: Գիտություն մեջ առավել հավանական է համարվել Հռոմ տեղանվան էտրուսկյան ծագումը: Ըստ Լ. Դերուայի և Մ. Մուլոնի տեղանունների բառարանի Rōma (Հռոմ) անվան ծագումը պարզ չէ: Լավագույն վարկածի համաձայն՝ այն լատինականցումն է էտրուսկյան Ruma ձևի, որը վկայված է էտրուսկյան Cneve Tarχunies Rumaχ «Հռոմեացի Գնեոս Տարկվինիոս» արձանագրության մեջ⁷²: Սակայն, հաշվի առնելով վերևում ասվածը, այն կարող է ստուգաբանվել որպես *h₂roh₁mo- «սև» նախածնի կանոնավոր լատինական արտացոլումը (h₂-ը հետք չի թողել, h₁-ը պատճառ է դարձել o-ի երկարության, իսկ -a-ն վերջավորություն է): Իհարկե, Հռոմի նախապատմությունը դժվար և բարդ խնդիր է: Հաշվի առնելով էտրուսկյան ենթաշերտի հավանականությունը՝ կարելի էր ենթադրել, որ էտրուսկյան անունը վերաիմաստավորվել է ըստ հիմնադիր երկվորյակների հնդեվրոպական առասպելի: Սակայն հնդեվրոպական, հատկապես հայկական ակնհայտ զուգահեռները ցույց են տալիս հենց հնդեվրոպական ստուգաբանության հավաստիությունը:

Հռոմի հիմնման լեգենդը մի շարք զուգահեռներ ունի հին իտալյան ցեղերի պատմության և առասպելների մեջ: Օրինակ՝ հայտնի է, որ լուկանիացի երիտասարդ ռազմիկները, ստորին դասերի ներկայացուցիչների հետ, կարողացել են հարևաններից տարածք նվաճել և մ. թ. ա. 356 թվականին այնտեղ հիմնադրել իրենց սեփական քաղաքը⁷³: «Սուրբ զարնան» (լատ. ver sacrum) ծեսը հայտնի էր գրեթե բոլոր իտալյան ցեղերի մեջ, սակայն լավագույն օրինակները հայտնի

⁷¹ Այս մասին՝ «սևի ու սպիտակի» առասպելի համատեքստում, տե՛ս Petrosyan. 2002, 75: Առասպելի հայկական տարբերակի մասին, որտեղ «սպիտակը» կոչվում է h₂elbh- արմատով, տե՛ս Petrosyan. 2002, 66–67.

⁷² Deroy, Mulon. 1992, 409, տե՛ս նաև Ernout, Meillet. 1932, 830; Поспелов. 2002, 352.

⁷³ Kershaw. 2000, 134.

են սաբիններին: Ըստ ծիսակարգի՝ զարնանը իբր պատանեկան ջոկատների և պատերազմի աստծո՝ Մարսի (նրան նվիրված կենդանու տեսքով) ղեկավարությամբ 20–21 տարեկան երիտասարդները լքում էին իրենց հողերը և, տեղափոխվելով այլ վայրեր, դուրս էին մղում տեղի բնակիչներին ու հիմնում իրենց բնակավայրերը: Իտալիայի ցեղերի մեծ մասը և շատ բնակավայրեր ունեին իրենց պատմությունները, որոնք սկսվում էին *ver sacrum* արշավանքների լեգենդից, իսկ Պրենեստե քաղաքի հիմնադրման պատմության մեջ առկա են նաև երկվորյակ կերպարներ (հիմնադրի ավագ ազգական-դաստիարակները, ինչը կարող է դիտվել որպես հիմնադիր երկվորյակների առասպելություն մի փոխակերպումը)⁷⁴: Այդ ծեսի մասին հաղորդում են մի շարք հին հեղինակներ (Ֆեստոս, Լիվիոս, Ստրաբոն, Դիոնիսիոս Հալիկաոնացի և այլք): Ստեղծված նոր քաղաք/հանրությունները երբեմն կոչվել են այն կենդանիների անունով, որոնք «գլխավորել» են սրբազան արշավը (օրինակ՝ գալլն ու փայտփորիկը, որոնք նվիրված էին Մարսին, ինչպես նաև ուրուրը, ձին և ցուլը), բայց եղել են նաև այնպիսիք, որոնք կոչվել են հենց Մարսի անունով (Marsi, Marricini, Mamertini): Ինչպես տեսանք, Ինդրապրաստհա, Արմավիր, ինչպես նաև Արմենիա «Հայաստան» երկիրը անվանակոչվել են նույն սկզբունքով (հմտ. Ինդրան, Արամանյակն ու Արամը՝ որպես պատանի ռազմիկների առաջնորդներ): *Ver sacrum*-ի նման ավանդություններ հայտնի են նաև հնդեվրոպական այլ ժողովուրդների չրջանում⁷⁵: Պետք է նշել, որ թեև *ver sacrum* ծեսը բացահայտ կերպով չի նշվում Ռոմուլոսի լեգենդում⁷⁶, սակայն նրա նմանությունը Հռոմի հիմնման ավանդությանն ակնհայտ է:

Այստեղ նպատակահարմար է նշել հնդկական, հայկական և հռոմեական երկվորյակների միջև ընդհանուր ծագումը ցույց տվող ևս մի քանի համապատասխանություններ: Մայրը Սանասարին ու Բաղդասարին հղանում է կախարդական «կաթնաղբյուրից» խմած մեկուկես բուռ ջրից, ընդ որում՝ Սանասարը ծնվում է մեկ, իսկ Բաղդասարը՝ կես բուռ ջրից: «Ռամայանայում» թագավորի երեք կանայք խմում են պայաս (կաթնային ըմպելիք է կամ չիլա): Թագավորի առաջին կինը՝ Ռամայի մայրը, խմում է պայասի կեսը, երկրորդը՝ մնացածի կեսը, երրորդը՝ երկրորդից հետո մնացածի կեսը, իսկ վերջին մնացորդը նորից տրվում է երկրորդ կնոջը: Արդյունքում ծնվում են Ռաման և նրա երեք եղբայրները: Երկրորդ կինը ծնում է երկվորյակներ, որոնք բեղմնավորվել են պայասի մեկ քառորդ և մեկ ութերորդ մասերից: Նրանցից առաջինը դառնում է Ռամայի (նրանց բեղմնավորման պայասների հարաբերակցությունը նույնպես 2:1 է), իսկ երկրորդը՝ երրորդ կնոջ որդու ուղեկիցը: Ակնհայտ է, որ կերպարները կրկնապատկելու և բազմապատկելու հնդկական բնորոշ միտումից բացի, հնդիկ ու հայ հերոսների ծննդյան պատմությունները գրեթե նույնական են⁷⁷: Սանասարն ու Բաղդասարը ուշ չրջանի անուններ են, և նրանց բնիկ նախատիպերը ազգածին ավանդության Արամանյակն ու Արամայիսն են, որոնց, ինչպես

⁷⁴ Dumézil. 1970, 253.

⁷⁵ Dumézil. 1970, 208; Kershaw. 2000, 136–137, 172–174.

⁷⁶ Momigliano. 1989, 58.

⁷⁷ Гринцер. 1974, 214–215; Ա հ յ ա ն. 1985, 33, Petrosyan. 2002, 64.

Ռամայի և Հռոմուլոսի անունները, կապված են հնդեվրոպական *h₂reh₁mo- «սև»-ի հետ:

Սասունի և Հռոմի հիմնման պատմություններում կան մի շարք այլ համընկնումներ՝ նշված Դյումեզիլի կողմից⁷⁸: 1. Երկվորյակներն արքայի թոռներն են, նրա դստեր որդիները, 2. նրանք ծնվում են գերբնական կերպով, 3. ազատում են իրենց պապին թշնամուց, 4. և իրենց մորը՝ նույն բռնակալից, 5. հրաժարվում են իրենց պապի քաղաքում մնալուց, 6. հիմնում են ապագայի նոր քաղաքը, 7. որը բնակեցնում են կամավորներով: Այս համընկնումները պարզապես աչքի են զարնում և, կարելի է ասել, եզակի են հնդեվրոպական առասպելաբանության մեջ: Սանասարի և Բաղդասարի մերձավորությունը հնդկական ու հռոմեական հերոսներին ակնհայտորեն ծանրակշիռ փաստարկ է Rōma < *h₂roh₁mo - ստուգաբանության օգտին:

Այլ զուգահեռներ: Կան այլ հնդեվրոպական վկայություններ առասպելական երկվորյակների կողմից քաղաքների հիմնման մասին: Հունական ավանդույթում երկվորյակ Դիոսկուրոսները հիմնադրել են Սպարտան և Դիոսկուրիա (ներկայիս Սուխումը), իսկ Ամփիոնն ու Ջեթուր կառուցել են Թեբեի պարիսպները: Մի լեգենդի համաձայն՝ Հյուսիսային Իռլանդիայի մայրաքաղաք Էմայն Մախան՝ «Մախայի երկվորյակները», հիմնվել է այն տեղում, որտեղ Մախա անունով հերոսուհին երկվորյակներ է ծնել: Նույն քաղաքների կապակցությամբ ի հայտ են գալիս նաև «սևի ու սպիտակի առասպելի» հետքեր՝ Սպարտայի արքաների երկվորյակ նախնիների մոր անունն էր Արգիա, Էմայն Մախայի մասին մեկ այլ լեգենդում հիմնադիր Մախայի և նրա ամուսնու նախնիներն էին Արգեստմալն ու Արգեստմորը (հմմտ. *h₂erg- «սպիտակ»)⁷⁹: Այս տվյալները կարելի է դիտել որպես առաջարկվող վերակազմությանն աջակցող փաստարկներ, սակայն դրանք հավելյալ նյութ է են տալիս վերակազմության համար:

Եզրակացություն

Այսպիսով վերականգնվում է երկվորյակների՝ պատանեկան եղբայրության անդամների կողմից քաղաքի հիմնման հնդեվրոպական առասպելը: Լավագույն համընկնումները հանդիպում են հայկական և հռոմեական ավանդույթներում: Հնդեվրոպական համատեքստում հայերենին ամենամոտ լեզուն հունարենն է⁸⁰, ինչը լավ համապատասխանում է հնագենետիկական վերջին տվյալներին⁸¹, մինչդեռ լատիներենը և իտալյան մյուս լեզուները բավականին

⁷⁸ Dumézil. 1994, 119–120.

⁷⁹ Երեք հարյուր սպարտացիների առասպելական կոփվր երեքհարյուր արգոսցիների հետ (Հ ե Ր Ո Ղ Ո Ս Ո Ս. 1986, 36–37): Ակնհայտորեն համապատասխանում է հռոմեացի և պլեյստոցեն երեքական երկվորյակ եղբայրների կոփին, ուր հակառակորդ քաղաքներից մեկի «սպիտակ» անվանումը ակնարկում է մյուսների՝ Սպարտայի ու Հռոմի կապը սևի հետ: Հատկանշական է, որ այդ կոփից հետո իբր արգոսցիները սկսել են սափրել իրենց գլուխները, իսկ սպարտացիները, ընդհակառակը, վարսեր պահել, որտեղ սափրված և մազածածկ հակադրությունը համադրելի է «սպիտակ» ու «սև» հատկանիշների հետ. տե՛ս Petrosyan. 2002, 76.

⁸⁰ Martirosyan. 2013, տե՛ս նաև Kassian et al. 2021.

⁸¹ Petrosyan, Palyan. 2025.

Հեռու են: Հնդկական, հայկական, բալթյան և հռոմեական զուգահեռների առկայությունը վկայում է առասպելի համահնդեվրոպական բնույթը (հավանաբար՝ բացառությամբ անատոլիական ավանդույթի):

Արմեն Պետրոսյան – բ. գ. դ., ՀՀ ԳԱԱ Հնագիտության և ազգագրության ինստիտուտի բանահյուսության բաժնի գլխավոր գիտաշխատող: Գիտական հետաքրքրությունները՝ հայ ժողովրդի ծագում, նախապատմություն, մշակույթ, տարածաշրջանի հին կրոններ և էպոսներ, հնդեվրոպական առասպելաբանություն, հայ վիպական բանահյուսություն, լեզվաբանություն: Հեղինակ է 15 գրքի և շուրջ 300 հոդվածի: ORCID:0000-0002-1982-5593. alpehist@gmail.com

ԳՐԱԿԱՆՈՒԹՅՈՒՆ

Աբեղյան Մ. 1966, Երկեր, հ. Ա, Երևան, ՀՍՍՀ ԳԱ հրատ., 572 էջ:

Աբեղյան Մ. 1975, Երկեր, հ. Ե, ՀՍՍՀ ԳԱ հրատ., 604 էջ:

Ագաթանգեղոս. 1983, Հայոց պատմություն, Երևան, Երևանի համալսարանի հրատ., 486 էջ:

Ալիշան Ղ. 1895, Հին հավատք կամ հեթանոսական կրոնք հայոց, Վենետիկ, Մխիթարյան տպարան, 524 էջ:

Ահյան Ս. 1985, «Սասնա ծռեր» հայկական էպոսը և հնդեվրոպական երեք ֆունկցիաները. – ՊԲՀ, № 1, էջ 32–46:

Աճառյան Հ. 1962, Հայոց անձնանունների բառարան, հ. Ե, Երևան, Պետական համալսարանի հրատ., 384 էջ:

Խորենացի. 1991, Պատմութիւն հայոց. քննական բնագիրը և ներածությունը Մ. Աբեղյանի և Ս. Հարությունյանի, Երևան, ՀԽՍՀ ԳԱ հրատ., 486 էջ:

Հարությունյան Ս. 2000, Հայ առասպելաբանություն, Բեյրութ, «Վ. Սէթեան» հրատ., 528 էջ:

Հերոդոտոս. 1986, Պատմություն 9 գրքից, թարգմ. Ս. Կրկյաշարյան, Երևան, ՀՍՍՀ ԳԱ հրատ., 651 էջ:

Հոմերոս. 1955, Իլիական, թարգմ. Հ. Համբարձումյան, Երևան, Հայպետհրատ, 512 էջ:

Ղանալանյան Ա. 1969, Ավանդապատում, Երևան, ՀՍՍՀ ԳԱ հրատ., 534 էջ + 33 ներդիր:

Ղռեշյան Լ. 2012, Երկվորյակների առասպելը և դրա տարբեր դրսևորումները հայ վիպական ավանդության համակարգում, Երևան, «Գիտություն», 151 էջ:

Մնացականյան Ա. 1976 Թուխ մանուկ հուշարձանների մասին. – ՊԲՀ, № 2, էջ 189–204:

Յովհան Մամիկոնեան. 1941, Պատմութիւն Տարօնոյ, Երևան, Մատենադարան, 300 էջ:

Պետրոսյան Ա. 2020, Հայկական էպոսի հնագույն ակունքները 2, Երևան, ՀԱԻ հրատ., 264 էջ:

Զահուկյան Գ. 1987, Հայոց լեզվի պատմություն. նախագրային ժամանակաշրջան, Երևան, ՀՍՍՀ ԳԱ հրատ., 748 էջ:

Սարգսյան Գ. 1998, Խորենացու «Հայոց պատմությունը» և սեպագրական աղբյուրները. – ՊԲՀ, № 2–3, էջ 27–50:

Սարգսյան Գ. 1998, Հատուկ անունների ստուգաբանությունը Մովսես Խորենացու պատմության մեջ. – ՊԲՀ, № 1–2, էջ 113–128:

Սեբեոս. 1939, Սեբեոսի եպիսկոպոսի պատմություն, Երևան, ԽՍՀՄ ԳԱ հայկական ֆիլիալ, 218 էջ:

Փավստոս Բուզանդ. 1987, Փավստոսի Բուզանդացու պատմություն հայոց, Երևան, Երևանի համալսարանի հրատ., 456 էջ:

Абаев В. И. 1979, Историко-этимологический словарь осетинского языка, т. 3. М.–Л., «Наука», 254 с.

Васильков Я. В. 2019, Армянский эпос о неистовых сасунцах и индийская «Махабхарата»: сходство этнографического субстрата. – «Археология, этнография и антропология Евразии», с. 140–147.

Гринцер П. А. 1974, Древнеиндийский эпос: генезис и типология. М., «Наука», 448 с.

Иванов В. В. 1980, Бык. – «Мифы народов мира», т. 1. М., «Советская энциклопедия», с. 203.

Иванов В. В., Топоров В. Н. 1974, Исследования в области славянских древностей. М., «Наука», 340 с.

Иванов В. В., Топоров В. Н. 1983, К проблеме лтш. Юмис и балтийского близнечного культа. – «Балто-славянские исследования 1982», с. 140–175.

Поспелов Е. М. 2002, Географические названия мира: топонимический словарь. М., «Астрель», 608 с.

Страбон. 1964, География (в 17 книгах). Пер. Стратановского Г. А. М., «Наука», 944 с.

Ahyan S. 1982, Les débuts de l'histoire d'Arménie et les trois fonctions indo-européennes. – «Revue de l'histoire des religions», № 199/3, p. 251–271.

Bremmer J. N. 1987, Romulus, Remus and the Foundation of Rome. – «Roman Myth and Mythography». London, «Institute of Classical Studies», p. 25–48.

Deroy L., Mulon M. 1992, Dictionnaire de noms de lieux. Paris, «Le Robert», 531 p.

Dumézil G. 1970, Archaic Roman Religion. Vol. I. Chicago, «University of Chicago Press», 394 p.

Dumézil G. 1992, Mythes et dieux des indo-européens: textes réunis et présentés par Hervé Coutau-Bégarie. Paris, «Flammarion», 322 p.

Dumézil G. 1994, Le roman des jumeaux. Paris, «Gallimard», 337 p.

Ernout A., Meillet A. 1932, Dictionnaire étymologique de la langue latine. Paris, «Kliencksieck», 1108 p.

Healey J. F. 2001, The Religion of the Nabataeans: A Conspectus. «Brill», 242 p.

Hoffner, H. A. 1988, Hittite Myths. Tr. by H. A. Hoffner. Atlanta, Georgia, «Scholars Press», 92 p.

Kassian A. S. et al. 2021, Rapid radiation of the inner Indo-European languages: an advanced approach to Indo-European lexicostatistics. – «Linguistics», № 59 (4), p. 949–979.

Kershaw K. 2000, The One-eyed God: Odin and the (Indo-) Germanic Männerbünde. Washington DC, Institute for the study of Man, 306 p.

Laroche E. 1985, Toponymes hittites ou pre-hittites dans la Turquie moderne. – «Hethitica», 6, p. 83–102.

Lincoln B. 1991, Death, War, and Sacrifice. Chicago, London, «Chicago University Press», 289 p.

Littleton S. C. 1982, The new comparative mythology: an anthropological assessment of the theories of Georges Dumézil. Berkeley, Los Angeles, London, «University of California Press», 319 p.

- Mallory J. P. 2007, Indo-European warfare. – “War and sacrifice: studies in the archaeology of conflict”. Leiden, Boston, “Brill”, p. 77–98.
- Mallory J. P., Adams D. Q. 1997, Encyclopedia of Indo-European Culture. London, Chicago, “Fitzroy Dearborn Publishers”, 829 p.
- Markwart J. 1928, Le berceau des arméniens. – “Revue des études arméniennes”, № 8, p. 210–232.
- Martirosyan K. 2010, Etymological Dictionary of the Armenian Inherited Lexicon. Leiden, Boston, “Brill”, 988 p.
- Martirosyan H. K. 2013, The Place of Armenian in the Indo-European Language Family: the Relationship with Greek and Indo-Iranian. – “Journal of Language Relationship”, № 10, p. 85–139.
- Mayrhofer M. 1996, Etymologisches Wörterbuch des Altindoarischen 2. Heidelberg, “C. Winter”, 865 S.
- McCone K. 1987, Hund, Wolf und Krieger bei den Indogermanen. – “Studien zum Indogermanischen Wortschatz”. Innsbruck, Institut für Sprachwissenschaft der Universität Innsbruck, S. 101–154.
- Momigliano A. D. 1989, The Origins of Rome. – “The Cambridge Ancient History”, vol 7, part 2, The Rise of Rome to 220 B. C., “Cambridge University Press”, p. 52–112.
- Petrosyan A. Y. 2002, The Indo-European and Ancient Near Eastern Sources of the Armenian Epic, Washington DC, Institute for the study of Man, 236 p.
- Petrosyan A. Y. 2011, Armenian Traditional Black Youths: the Earliest Sources. – “Journal of Indo-European Studies”, p. 342–354.
- Petrosyan A. Y. 2012, First Capitals of Armenia and Georgia: Armawir and Armazi (Problems of Early Ethnic Associations). – “Journal of Indo-European Studies”, p. 265–288.
- Petrosyan A. Y. 2018, From Armenian Demonology: the K’aġs. – “Journal of Indo-European Studies”, p. 206–218.
- Petrosyan A. Y. 2018a, The problem of Armenian origins. Washington DC, Institute for the Study of Man, 232 p.
- Petrosyan A. Y., Palyan A. I. 2025, The problem of Armenian origins in the light of recent archaeogenetic data. – “Matenadaran: Medieval and Early Modern Armenian Studies”, № 2, p. 69–94.
- Puhvel J. 1974, Indo-European Structure of the Baltic Pantheon. – “Myth in Indo-European Antiquity”. Berkeley, Los Angeles, London, “University of California Press”, p. 75–85.
- Puhvel J. 1987, Comparative mythology. Baltimore, London, “Johns Hopkins University Press”, 302 p.
- Puhvel J. 1991, Hittite etymological dictionary. Vol. 3, Berlin, New York, “de Gruyter”, 461 p.
- Sergent B. 2003, Les troupes de jeunes hommes et l’expansion indo-européenne. – “Dialogues d’histoire ancienne”, № 29, p. 9–27.
- Schmitt R. 1984, Iranische Namensschichten und Namentypen bei altarmenischen Historikern. – “Beiträge zur Namenforschung”, № 19, S. 317–331.
- Speidel M. 2002, Berserks: A history of Indo-European ‘mad warriors’. – “Journal of World History”, № 13/2, p. 253–290.
- Vassilkov Y. V. 2015, Animal symbolism of warrior brotherhoods in Indian epic, history and culture. – “The volatile world of sovereignty: the Vratya problem and kingship in South Asia”. New Delhi, p. 231–253.

Vian F. 1960, Le myth de Typhé et le problème de ses origines orientales. – «Eléments orientaux dans la religion grecque ancienne». Paris, PUF, p. 17–37.

Vidal-Naquet P. 1986, The Black Hunter. Baltimore, London, “The John Hopkins University Press”, 392 p.

Wikander S. 1950, Sur le fonds commun indo-iranien des épopées de la Perse et de l’Inde. – “La Nouvelle Clio”, № 1, p. 310–329.

ИНДОЕВРОПЕЙСКИЕ «ЧЕРНЫЕ» ЮНОШЕСКИЕ БРАТСТВА, МИФОЛОГИЧЕСКИЕ БЛИЗНЕЦЫ И ОСНОВАНИЕ ГОРОДОВ

АРМЕН ПЕТРОСЯН

Резюме

Ключевые слова: индоевропейские юношеские братства, индоевропейская мифология, индоевропейская ономастика, армянский эпический фольклор, Армавир, Ромове, Рим.

В индоевропеистике восстанавливается существование братств юных воинов, которые под руководством наставников, занимаясь охотой и грабежами, в течение нескольких лет жили на окраинных территориях племени. Лишь после этого, пройдя ритуал инициации, молодые люди могли стать полноправными членами племени, жениться и иметь имущество. Именно этим братствам отводится ключевая роль в распространении индоевропейцев по всей Евразии. Их набеги и завоевания территорий привели к созданию там поселений, а затем к переселению туда новых групп людей, включая взрослых, женщин и детей. Отличительной особенностью юных воинов братства была связь с черным/темным цветом. И в некоторых традициях сами юнцы и их мифологические воплощения могли называться «черными», на основе индоевропейского корня **h₂reh₁mo-* «черный, темный цвет». Известны индоевропейские легенды об основании поселений/городов близнецами героями, выступающими в качестве мифологических персонификаций юношеских братств, притом города также могут называться «черными» на основе этого же корня. Наличие армянских, балтийских, римских и других параллелей свидетельствует об общеиндоевропейском характере данного мифа (возможно, за исключением анатолийской традиции).

*Армен Петросян – д. филол. н., главный научный сотрудник отдела фольклора Института археологии и этнографии НАН РА. Научные интересы: происхождение, древняя история и культура армянского народа; древние религии и эпосы региона; индоевропейская мифология; армянский героико-эпический фольклор; лингвистика. Автор 15 книг и около 300 статей.
ORCID:0000-0002-1982-5593. alpehist@gmail.com*

INDO-EUROPEAN “BLACK” YOUTH FRATERNITIES,
MYTHOLOGICAL TWINS, AND FOUNDATION OF CITIES

ARMEN PETROSYAN

Summary

Keywords: Indo-European youth fraternities, Indo-European mythology, Indo-European onomastics, Armenian epic folklore, Armavir, Romove, Rome.

In Indo-European studies, the existence of fraternities of young warriors was restored; they, under the guidance of mentors, were engaged in hunting and plundering and lived in the outlying territories of the tribe for several years. Only after this, having undergone the initiation ritual, the young men could become full members of the tribe, get married, and own property. These brotherhoods played a key role in the spread of Indo-Europeans throughout Eurasia. Their raids and conquests of territories led to the establishment of settlements, and then to the resettlement of new groups of people, including adults, women and children. The distinctive feature of the young warriors of the brotherhoods was the association with black/dark color. In some traditions the young people themselves, or their mythological incarnations, could be called “black” on the basis of the Indo-European root **h₂reh₁mo-* “black, dark color”. A number of legends are known in which cities are founded by twin heroes who appear as mythological personifications of youth fraternities, moreover, the cities can also be called “black” based on the same root. The Armenian, Baltic, Roman, and other parallels attest to the pan-Indo-European nature of this myth (perhaps with the exception of Anatolian tradition).

Armen Petrosyan – Doctor of Philological Sciences, Senior Researcher at the Department of Folklore, Institute of Archaeology and Ethnography, National Academy of Sciences of Armenia. Scientific interests: origin, prehistory, and culture of the Armenian people; ancient religions and epics of the region, Indo-European mythology, Armenian heroic-epic folklore, linguistics. Author of 15 books and about 300 articles. ORCID:0000-0002-1982-5593. alpehist@gmail.com